

東
華
續
錄

東華續錄

同治八十二

臣王先謙敬編

臣張式恭恭校

十一月戊辰朔予湖北陣亡道員徐豐王建祠○己巳諭軍機大臣等穆圖善奏遵旨派員齎送總督關防並克復狄道等處出力員弁請仍擇尤保獎各摺片穆圖善已於十月初六日將陝甘總督關防派員齎送涇州交左宗棠接受惟該將軍甫經卸篆應辦之事尙多著准其刊刻甯夏將軍木質關防以昭信守除地方尋常公事卽由藩司包封遞左宗棠行營辦理外如遇緊要軍務著該將軍懍遵前旨率同在城文武力籌保衛毋稍疏虞並著督率所部兵勇隨時勦辦不得稍涉諉卸穆圖善俟左宗棠到省或由左宗棠派員抵蘭接辦防務有人再行聽候諭旨上年各軍克復

狄道州並河州秦子寺汛在事各員弁尙屬著有微勞著准由該將軍擇尤保奏毋許冒濫將此由五百里諭令知之○諭前據左宗棠奏稱黃鼎等軍獲勝甘省驛道疏通以楊世俊等營分路進紮並令黃鼎先赴蘭垣附近擇要安營此時北路情形計可殲定該大臣得以進規河州矣本日據穆圖善奏派員齎送總督關防前赴涇州軍營該大臣諒已在途祇受惟念蘭州爲根本重地該大臣接篆後於省城防剿一切事宜自係責無旁貸見在河州等處賊巢林立近偏省垣卽使黃鼎各軍皆能繼進亦不可無人指授機宜穆圖善旣卸督篆凡西路軍情及地方應辦事件均覺呼應不靈該大臣能否卽由平涼親赴蘭州居中調度抑一時不克前進先行派人前往接辦或以接辦乏人仍畱穆圖善暫駐省垣照料軍務俟到後再行交替該大臣酌度情形著於接奉此旨後

迅速詳細奏聞以慰廑繫近日各路軍情若何黃鼎等軍何時馳抵蘭州劉松山軍在北路辦理勦撫事宜能否漸次肅清仍著該大臣督飭在事將士相機掃蕩迅奏膚功將此由六百里諭令知之○諭河南嚴禁蘆鹽越境侵銷○修山西崞縣城○辛未諭軍機大臣等曾璧光奏普安餘匪闖入安南旋經官軍收復上游苗匪投誠歷久相安各一摺嚴大五勾結回苗各匪復行闖入安南縣城該文武等力戰數月當將縣城克復在事出力員弁准由曾璧光歸入春間收復普安安南兩城案內彙保該撫仍檄令官軍接捕餘匪務絕根株並督飭地方官將善後事宜妥籌辦理黃荆蔭繳械投誠經署水城通判袁開第督同文武官紳妥爲布置歷久相安尙屬著有微勞准其擇尤保奏仍著曾璧光飭令各該員隨時約束毋任再滋事端將此由六百里諭令知之○諭前因貴

州遵義教士因傷殞命疊經諭令曾璧光妥速籌辦並令李鴻章會同辦結李鴻章前派道員余思樞馳往查訪計早抵黔曾璧光諒已派員會辦此案總以教士因何身死爲最要關鍵必須質證明確斷不可稍涉含糊見在法國使臣羅淑亞業已出京赴滬聲言欲帶兵船赴川實因川黔教案未結著曾璧光懍遵疊次諭旨嚴飭委員會同余思樞速將此案了結不得稍有延宕將此由六百里諭令知之○壬申諭內閣前因左宗棠奏提督劉松山勦辦靈州回匪連獲大捷請將該提督前次失察游匪一案革職畱任處分懇恩開復等情當經諭知該大臣俟查明靈州失守情形後再行降旨茲據金順奏稱劉松山到靈州後勦撫兼施見已將州城克復勦辦甚爲得手等語與左宗棠所奏大略相同劉松山向來打仗甚稱得力此次勦辦靈州回匪尤能迅赴戎機謀勇兼備

劉松山著准其開復革職畱任處分其前案內失察之分統營哨各官均皆隨同打仗著有微勞著一併免其查參此外出力各員著准由左宗棠擇尤保獎毋許冒濫○諭軍機大臣等前因都興阿等奏覆勘展邊事宜當經諭令該將軍等俟朝鮮覆文日妥慎籌辦並因禮部奏據朝鮮國王咨請於沿江之地嚴禁偷越亦經諭令該將軍等飭屬認真辦理茲據禮部奏據朝鮮國王咨覆奉准江岸一帶酌畱三五十里劃清界限之議請於原野平闊之處劃界稍遠等語著都興阿額勒和布恩錫查照該國王所請在江岸寬平處所酌量籌辦並於展邊之時將界限劃清仍遵前旨督飭各該地方官遇有游民私墾及滋擾等弊立即密拏懲辦毋稍疏忽以申邊禁而靖地方朝鮮國王咨文均著鈔給閱看將此各諭令知之○諭前因總理各國事務衙門議覆富明阿等奏朝鮮

國人往俄界墾地應由朝鮮早申禁令當諭禮部行文該國王妥爲辦理茲據禮部奏稱准富明阿轉據甯古塔副都統咨報琿春協領訥木津奉飭前往摩闊歲會晤俄官面議兩國交涉事件於中途遇朝鮮國男婦四五十人陸續越界均由珠倫河前往海沿問其來歷言語不通因係俄界未便攔阻旋密查海沿嚴杵河棘心河等處已聚集千餘人續投者尙紛紛不止請由該部行文該國王飭令邊界官悉數領回等語朝鮮國民人潛投俄界男婦成羣竟至千餘名口之多難保不愈聚愈眾該國王自應及早禁止庶不至別滋釁端著禮部迅卽行文該國王將逃赴俄界民人飭令該國邊界官悉數領回並由該國王申明禁令嚴飭該國沿邊官弁約束民人毋許再有逃越以重邊防並著富明阿飭令訥木津會商俄國廓米薩爾務將朝鮮越界民人悉行逐回不得久畱

俄界以致別生枝節原摺著鈔給富明阿閱看將此諭知禮部總理各國事務衙門並由五百里諭令富明阿知之○左宗棠奏劉松山一軍九月二十三日克復靈州城並破四寨一壘十月初二日攻克里仁渠一帶九寨前於摺內約略敘及然未接劉松山公牘故戰狀不能詳茲據牘稱九月二十二日馬化澂復遣漢民解米糧十萬斤來營具保馬化澂永無反覆狀仍不言呈繳馬械劉松山以撫局關鍵首在呈繳馬械今馬化澂仍襲從前故智冀以甘言微利了事非誠心求撫可知察看金積堡東北馬家兩寨楊家寨金何李丁四寨雄峙參錯深壕環繞渠流滿注其中距提督蕭章開劉家營壘五里是夜劉松山傳令各營攜鋤鍤草束四鼓出隊向劉家寨取齊馬步分五路布疊陣銜枚夜行一向馬家寨進一向楊家寨進各支列陣於後以拒各堡援賊比抵寨前賊始

驚覺官軍號鼓齊鳴立將各寨合圍寨上礮石雨下各營擲草平
壕揮鋤掘堡併力攻之火器環施飛光電轉天明楊家寨積薪著
火煙燄蔽天寨中呼號喧噪壯士乘機猛進一鼓克之馬家兩寨
見楊家寨已破恟懼益甚各營乘勝薄之兩寨亦相繼而下劉松
山比傳令各營進攻李丁金何四寨察看李丁兩寨地勢低窪溝
渠交錯飭各營運蘆葦築壩蓄水灌之未幾金積堡馬步援賊繼
至劉松山自督各營穩築壩隄派道員劉錦棠提督蕭章開軍功
董福祥分中左右三路擊之提督李占椿李雲貴爲接應提督潘
運璋陳宗蕃進左路之左提督彭緒圻譚上達進右路之右各營
奮威衝殺賊勢不支折而西奔官軍馬步急追至秦渠邊賊中人
馬擁擠橋梁忽斷殿後之賊見水而過截斃溺斃無算餘賊向金
積堡遁去各營返旗攻李丁兩寨渠水已淹偪寨腳矣寨賊勢蹙

開西門出奔金何兩寨賊眾亦倉皇棄巢鼠竄官軍分支鈔殺殘賊又多餘賊敗歸金積堡劉松山卽令官軍分營填上所破五寨收隊而旋是役計殲斃焚斃回逆約一千五百餘名回目馬王喜已於堡破時格殺生擒百餘名內有回目馬得三當卽訊明正法官軍陣亡員弁勇丁二十七名受傷一百七十一名此九月二十三日攻克劉家寨西北寨壘七座大獲勝仗情形也是日吉林馬隊及畱駐花馬池定邊四營來下橋會師詢悉提督黃萬友副都統雙壽於十六日道出橫城時適探南路有騎賊駛到意似迎抗官軍黃萬友督飭步隊雙壽督馬隊張左右翼迎擊馬賊結數十團猛撲而來氣殊驕甚官軍併力壓擊槍礮刀矛齊進賊敗退追逐十五里始行收隊計斃賊二百餘名官軍陣亡勇丁十名受傷十二名劉松山以該逆於竊踞靈州後因官軍未加懲創自謂得

計此次仍敢截阻後路之師應予痛剿二十四日先諭馬化澂令靈州踞城叛回速出就撫免其剿辦二十七日馬化澂始具稟來營仍請寬限劉松山知其詐嚴飭之詞靈城賊畱精壯守城並引陝回入城助守其眷屬輜重則已於先日潛移金積堡矣二十九日五鼓劉松山傳令各營裹糧夜起仍分五路布疊陣整隊向靈州進架橋過清水溝行數里時已午刻瞭見城南卡壘甚堅賊旗林立左右野潦縱橫淺者猶及馬腹劉錦棠蕭章開分左右路梟水而進劉松山督各路直擣中堅抵城南五里團圓寺卡各營槍礮仰轟拔去蒺藜架木爲橋踰壕而上克其外卡餘賊向南門外里許之石壘竄遁官軍緊蹙之忽城東塵氛大起突出馬賊千餘向西南馳突意圖鈔截劉松山飭提督余虎恩馬隊擊其左雙壽馬隊擊其右董福祥步隊副之騎賊撲近陣前官軍馬步相依縱

橫盪決斃悍賊數十名敗賊折向東南飛奔各營追殺十五里維時劉錦棠蕭章開已鈔近附城之卡壘旁矣城賊開南門出卡拚死拒敵劉松山飭黃萬友周國勝朱德開李就山知州李樹棠奮力圍攻城南石壘自督陶寶昇易致中何作霖譚拔萃從中路猛進槍礮環攻雷轟電掣賊勢不支爭入卡門拋棄器械自相蹂踐劉錦棠蕭章開乘勢奪卡而入敗賊縮退城中各營躡蹤搶入見賊卽砍城賊開東北兩門狂竄官軍分道躡之追殺五里天色已向晚矣收隊回城其南門外石壘踞賊二百餘名經黃萬友攻破擒斬無遺是役實斃賊一千四五百名生擒二百七十三名訊明賊目馬元生馬致和郭有利正法軍前拔出漢民男婦七百餘人官軍陣亡員弁三十一名受傷一百八十一名此二十九日克復靈城大獲勝仗實在情形也是夜調靈城敗賊踞城東迤南十里

之海子墩買家莊十二里之馬清兒羅家橋四寨劉松山畱營駐防親督各營四鼓出隊派劉錦棠蕭章開向海子墩進自督各軍向買家莊進飭馬隊伏左右兩路並戒步隊如未破寨則列隊勿動也部署既定軍士銜枚疾行直薄寨下賊始驚覺中軍擂鼓發號火器仰攻寨上亦礮石雨注軍士擲草掀土填壕而過焚寨門掘堡腳四面擁登立將海子墩買家莊攻克該兩寨回逆四五百名悉數殲之其馬清兒羅家橋兩寨踞賊見火光如晝喊聲震地礮轟如雷知官軍已奪海子墩買家莊矣遂開堡門從東南狂奔余虎恩雙壽馬隊左右鈔殺之壓迫十八里收隊而還是役斃賊六百餘名生擒四十二名訊畢於軍前正法拔出漢民男婦二百餘名官軍陣亡弁勇十四名受傷五十八名此三十日攻破靈州城外四寨獲勝情形也劉松山進城後察看城內倉廩廟宇官廨

民廬半成灰燼瓦礫塞道飭黃萬友李樹棠移兩營駐之將節次
拔出漢民安插州城設法撫輯一面招徠漢民認產復業初一日
自率馬步各軍收回下橋老營營東十里爲里仁渠大小兩寨迤
西兩莊迤北里許爲趙家寨迤東二里爲楊家三寨楊家寨迤北
三里許爲馬家兩寨賊踞其中劉松山是夜傳令各營四鼓出隊
分枝向里仁寨趙家寨進自督中軍相機而動令馬隊伏東南二
三里防西南援賊劉錦棠蕭章開抵里仁寨半里守賊見官軍至
大寨礮聲起小寨之賊倉皇出巢蟻附大寨各營乘勢跟蹤奪門
而入賊眾死鬪槍礮對轟壯士從寨後肉薄而登寨內之賊狂號
出奔官軍一鼓擁入寨門敗賊無路可逃有墮牆而殞者有投井
而斃者守賊約四五百名蒐薙淨盡劉松山乘勝督各營進楊家
三寨令朱德開李就山董福祥圍趙家寨拔之守寨之賊約三四

百名僅逸出馬賊數十騎餘悉殲旃楊家三寨之賊見各寨火起開門向正東狂竄陶之昇易致中何作霖周國勝兩路鈔殺之偏入山水溝淹斃截斃無算餘逆折向東南敗走天色已明忽西南塵氛蔽空突有騎賊二千餘來勢兇猛劉松山派劉錦棠蕭章開督隊進正東攻馬家兩寨自督步隊攔頭迎擊飭馬隊左右鈔之悍賊死拒不退適馬家寨之賊經官軍攻破紛紛出寨亂竄賊眾返顧忙亂亦向西南潰走各軍四路掩殺陣斬步賊三百餘名收隊而還是役共計實斃賊一千數百名生擒一百一十一名內有賊目趙萬辣馬幅意訊畢斬之官軍陣亡員弁勇丁十八名受傷九十四名此十月初二日攻克里仁渠大小八寨兩莊之實在情形也方劉松山之入靈州也馬化澂來稟靈回正在出城忽有南來陝回乘間進城焚掠請示遵辦並央派辦撫局之總兵胡昌會

請於甯郡五屬擇地安插意在飾其句結之謀不意劉松山九月二十三日破馬家寨時已接出馬化澁九月十三日給僞參領馬三重吳天德楊長春糾黨抗拒僞札一封僞銜刻統理甯郡兩河等處地方軍機事務大總戎馬鈴以僞印其狂悖之狀陰狡之謀已經敗露也陝回陳林馬正和等股及從前雜匿金積堡之鄒保和沙學德等據雷正綰等馳報初七日又經劉松山痛勦勒令悉數呈繳戰馬軍械尙未接據劉松山馳報其雷正綰周蘭亭初八日由四百戶馳抵鳴沙洲訶張恩堡東西四堡爲馬化澁先鋒袁希孟所踞初九日兩軍整隊齊進先攻東西依崖兩堡破之斃賊二三百名釋其老幼婦女獲戰馬六十餘匹袁希孟卽率西面三堡同眾伏地泣懇收撫願將馬械悉數呈繳雷正綰等受之正點驗間忽見賊騎數百急馳而西雷正綰等列隊堵截賊不意大軍

倏至駭懼失措官軍馬步急擊之斃賊約二百名訊擒賊供始知此股卽馬正和馬長順之黨初七日經劉松山擊敗者也初十日雷正綰由張恩堡進滾泉進疊水適簡敬臨張福齊兩軍東自章州前來合隊十二日行至強家沙窩擇要分駐秦隸內外距金積堡皆不過十餘里臣以勦撫機宜未可遙制必事權歸一乃策全功檄雷正綰周蘭亭簡敬臨張福齊所部各營進止緩急次第均候劉松山商酌定奪冀免歧誤又奏前檄補用道李耀南湯聘珍等各率所部分布秦州秦安通渭一帶穆圖善飭記名提督涼州鎮總兵傅先宗總統敖天印喻正祥彭忠國等馬步各營扼勦河狄竄賊力顧蘭垣餉道嗣據記名提督梅開泰稟請裁兵節餉臣宗棠當飭精爲挑選併成五營歸湯聘珍節制隨同防勦維時狄河逆賊時以零騎游掠通渭伏羌西和禮縣等境然皆非大股也

九月二十二日湯聘珍詞河回關入禮境窺伺徽成人數頗多督同梅開泰約虎威營出隊馳剿二十五日行至西禮交界之長道鎮偵賊大隊盤踞西和縣城北三十里之石堡城下寨地方當就地築壘一面令梅開泰率馬隊且探且進步隊繼之抵鄭家堡出山峽賊馬步叢擁而來梅開泰分營一由右扼山麓一由左扼山腰自率馬步直擣中路槍礮環施斃賊數十名正酣戰間湯聘珍及副將田連考各率所部馳至奮威衝殺騎賊擁奔步賊大潰各軍緊躡之由鷓子坪追殺至王家窯日暮收隊計斃賊三百餘名生擒二十餘名二十六日黎明賊騎數百仍排列峽口似誘官軍深入者適謀報二十五夜游匪嘯聚一二十人來禮縣與西河敗賊合結寨石城堡迤南馬跑泉圖阻官軍進剿之路湯聘珍遂督隊分兩枝緣鄭家堡楊家觜頭堡擊之登高瞭見步賊數十圍伏

峽中飭各營嚴陣以待賊旋引去二十七晚選壯士百餘乘黑夜襲賊營火箭火彈拋入焚其柵卡賊眾慌亂棄寨狂奔二十八日梅開泰率馬隊追過西和縣城二十九日收隊回營方賊之竄入西和也湯聘珍函約傅先宗督同各營會剿初一日傅先宗抵西和城下遙見馮家莊一帶煙燄彌空策馬飛進賊正圍攻姜席家川堡官軍馬隊循南北山峽鈔擊賊駭而奔堡圍立解是夜訶賊踞江口刺壩兩處湯聘珍督同梅開泰倍道出禮縣截其北竄之路詰朝傅先宗馬步向刺壩追賊至碧玉河突有另股伏賊橫出山谷之旁傅先宗卽飭喻正祥督隊分途猛擊賊遂披靡喻正祥追殺二十里至立隄壩傅先宗自督馬步追殺三十餘里至廟兒埡敗賊向岷屬炭廠遁入狄河各軍收隊而還計初一初二兩日斃賊約近千名生擒六十餘名據擒賊供此股賊目劉四花鄉約

馬元和世輔張老五皆西禮叛回糾眾三千餘人流入狄河河州賊目馬尨大助以馬步千餘沿途夥結游勇千餘眾意圖襲踞禮縣二十五日之戰馬元已被槍傷訊畢斬之其時道員李耀南一軍已抵通渭馬營監十月初一日訥通渭屬李家灣一帶有河州回逆麇集攻堡掠糧賊目爲甯阿洪馬洪幅糾合北路敗回由狄道隴西漳縣榜羅鎮竄來約三四千眾初二日黎明李耀南派總兵殷華廷率馬隊前驅自率馬步各營繼進行二十里抵牛山遇賊前隊殷華廷擊敗之官軍追近李家灣賊回旗抗拒分股從李家灣南北兩溝鈔出李耀南率所部緊結方陣分中左右三路應之殺賊二百餘乘勢壓擊追至通安驛敗賊向內官營遁去另股騎賊自北路來援復經督隊擊敗臣維狄河回逆負嵎恃險廣行勾結此次糾約出巢自係迎護陝回崔三禹得彥敗殘餘黨經官

軍擊敗遁歸巢穴臣穆圖善前調傅先宗進規河狄臣宗棠已催令遵檄前進恪遵調遣並嚴飭南路在防諸軍相機堵剿力顧後路又奏據劉松山牘稱克復靈州後詢知該州甘回素聽馬化澂之命地方公事及征收錢糧向皆馬化澂主政在城文武各官薪糧皆由馬化澂發給回眾藐視官長而不受約束官長坐視回眾而莫可如何以致倉卒變生莫能救護前代理靈州知州尹泗其弟藍翎卽選從九品尹溱並眷屬家丁十餘口及見署靈州知州甘肅候補同知鍾蘭其子鍾爾規同時服毒自盡前派去護餉之總兵曹加正副將陳明遂辦糧委員副將陳永錫謝明華張福星彭友亮參將張細祿副將王榮華隨去勇丁七名均被戕害當州城未陷之前署靈州營參將馬福守備李繡春州吏目黃廷輝等察知回眾叛形已露約同出城赴營送信求援該參將等復於途

中遇賊守備李繡春不知下落此次克復州城卽派馬福黃廷輝
作爲前導臣維靈州甘回本馬化澁黨夥馬化澁從前名雖就撫
實仍以其新教部勒甘回自成一類久之老教亦被其脅服陝甘
回民尊之爲主自稱爲吾哂目蓋回語奴才也其私授僞官有參
領協領等名其自稱爲大總戎稱官軍爲敵人狂悖如此見因攻
破甘回寨壘搜獲賊中僞文始知其詳劉松山前抵靈州恩恩南
下未據該文武稟知逆情將軍餉寄頓城中僅派弁勇十餘名守
護以致同遭其難見經官軍攻克州城逆賊殲滅殆盡死事諸文
武應懇 天恩均照陣亡例議卹馬福黃廷輝聞變出城求援嗣
導官軍克復城池可否免其置議出自 天恩又奏頃接劉松山
緘稱因陝回呈繳馬械遲延仍懷叵測初七日進剿連破秦渠南
板橋馬家兩莊納家三寨丁家兩寨劉家灣子三莊馬家灣子四

莊何家兩莊西至蔡家四寨金家兩莊一帶陝回所踞村莊斃賊二千餘名生擒近三百名獲賊眷六百餘口官軍亦有傷亡馬化澂見失署河州鎮總兵胡昌會保其永不反覆並力保陝回悉數呈繳馬械其詳細形容俟續報到日再行馳奏臣拜摺後卽進駐平涼又奏甘肅秦州毘連川陝僻在一隅稍稱完善近年以來協餉之來專取道於此重兵亦翕聚其間其始藉兵力以護餉藉民力以養兵其繼兵增而餉愈艱民窮而寇愈熾臣自率師規隴卽派中書吳士邁道員湯聘珍李耀南由汧隴趨秦州會同甘軍隨時堵剿一面諭知甘軍各將領裁併成營以期實濟提督梅開泰首先遵辦裁十營併成五營總兵敖天印繼之察看情形事體尙無滯礙如果辦理得宜未嘗不可收餉節兵精實效特一時乏此鉅款旣虞遣撤爲難而主持苟非其人轉恐激成別故昕夕焦

思苦無全策適船政提調前護福建巡撫道員周開錫帶解餉銀
馳赴臣營維甘肅北路中路均有制賊之軍南路雖有穆圖善
與臣撥派之軍而彼此勢分等夷各不相下非得治軍之才假以
事權難期指臂相聯共襄撻伐見已檄令周開錫馳赴秦州總統
諸軍將南路兵事餉事認真整頓 上諭甘肅狄河回匪糾合陝
回崔三等餘黨出巢肆擾經穆圖善派傅先宗進剿獲勝左宗棠
又檄李耀南等軍敗賊於李家灣一帶斬獲甚多其甯夏南路回
匪楊士恭等勾結陝回援應納王各寨又經金順張曜督軍迎剿
屢獲勝仗剿辦均屬奮勉見在陝境肅清各匪已無立足之處勢
必要挾甘回苟延殘喘如能將河狄各賊巢逐一攻破斷其黨援
則剿撫皆易得手著左宗棠仍飭李耀南等及前派出之黃鼎各
軍乘機進剿毋稍鬆勁一面嚴檄南路在防將士實力嚴防以免

顧此失彼穆圖善亦當札飭傅先宗等與陝軍聯絡聲勢迅掃逆氛納王各寨爲回逆負固之區仍著金順會同張曜迅圖攻拔毋任憑險死守阻截官軍左宗棠奏查明靈州失陷文武下落情形請將各員免議等語署靈州參將馬福吏目黃廷輝旣據奏稱聞變求援並導官軍克復城池情尙可原馬福黃廷輝均著免其置議其劉松山收復靈州情形與本日金順所奏大略相同該大臣見擬進駐平涼著卽懷遵前旨將能否馳赴蘭垣情形迅速具奏回目馬化澂旣給馬三重等僞札是其狂悖之情業已敗露而又求總兵胡昌會保其永不反覆並力保陝回呈繳馬械前後兩歧殊難憑信卽著該大臣嚴飭劉松山等乘此軍威迅圖掃蕩該逆如實係真心乞撫仍著左宗棠責成劉松山相機妥辦萬不可爲甘言所誘輕率收撫轉遂奸謀周開錫旣馳赴秦州派令總統諸

軍卽檄飭該道員將南路兵事餉事認真整頓以資臂助北邊勦撫事宜著卽檄知雷正綰等與劉松山商推以免紛歧將此由六百里各諭令知之○飭山西添撥月餉一萬兩濟金順軍○予甘肅傷亡提督易德麟祭葬世職建祠陣亡總兵官楊玉賢副將李大勝等祭葬世職○甲戌飭河南添撥河工銀三十八萬兩○丙子山東荏平縣教匪孫上汶等謀逆捕獲伏誅○丁丑諭內閣福濟奏遵議布倫托海辦事大臣請卽裁撤仍歸科布多管轄一摺新設布倫托海辦事大臣旣經該將軍與奎昌錫綸等相商均以裁撤爲宜自係實在情形著卽照所議裁撤所有該城官兵卽行撤回其新頒印信卽著撤銷索倫厄魯特等處領隊大臣及棍噶扎勒參應辦事宜並奏咨各件著統歸科布多參贊大臣經理以符舊制而一事權喇嘛歲支茶布銀兩及棍噶扎勒參於一二年

後應否與各處呼圖克圖一體輪流年班進京之處著理藩院妥議具奏此次裁撤布倫托海係屬改歸舊制著福濟等妥爲曉諭俾各守分安居朝廷初無歧視毋得互相議論致兵民人等復生疑慮也○諭軍機大臣等福濟奏遵議裁撤布倫托海請仍隸科城一摺所議甚是布倫托海本係科境阿爾泰山一隅之地該處設城後辦理諸多窒礙卽著照所請裁撤將新設布倫托海辦事大臣印信繳銷所有索倫厄魯特各領隊大臣及棍噶扎勒參應辦事宜統歸科布多大臣辦理以符舊制海城官兵裁撤後所餘官弁除經手糧餉之員暫畱科城辦理覈銷外其餘旗營官兵仍著照前次奏定章程分駐熱河等處綠營官兵情願入伍者亦卽照福濟所議呈明口內各營汛以原銜當差隨時酌補不願者亦聽其便但不可逗畱科城致生事端奎昌等務當隨時畱意妥爲

經理福濟亦當與奎昌等和衷商酌不可稍存膜視將此由五百里各諭令知之○戊寅諭軍機大臣等曾璧光奏覆陳敘務情形一摺據稱遵義府城民教爭鬪業委道員陳昌運馳往查辦先將藉事搶擄之民人傳有沅訊明正法民教悉已解散並將教士三人於六月十三日護送到省七月初七日據代辦主教任司鐸照會趙教士到省後於初六日因傷身死該撫委員往驗而任主教復以業經殯厝未便開棺相驗攔阻至梅教士在仁懷被殺一語有無其事已派員往查等語此案既據曾璧光查明趙教士並非因傷身死該主教又有攔驗情事即可從此設法了結折服其心梅教士是否被殺亦應確切查明見在李鴻章所派之道員余思樞計早抵黔卽著李鴻章曾璧光飭令余思樞並該省委員等迅速持平辦理及早結案免致羅淑亞到後另生枝節將此由六百

里各諭令知之○綏遠城將軍定安奏嵩武軍會剿南路踞逆攻拔王洪堡等處賊巢得旨著卽知照張曜會同金順將納王等寨迅速攻拔以靖逆氛○己卯諭軍機大臣等恩麟奏巡閱後藏起程日期並親歷邊隘妥籌安撫一摺前因廓爾喀與唐古特頗有猜嫌諭令恩麟前往邊界妥爲籌辦恩麟見已定期起程巡閱後藏卽赴廓番交界親自禁約該大臣務當懷遵前旨不動聲色於開誠布公之中仍不失長駕遠馭之意以期潛消罅隙邊境乂安恩麟啟行後藏中一切事宜卽著德泰妥慎辦理毋稍疏虞將此由五百里各諭令知之○飭直隸等省撥解東三省官兵俸餉銀○廣湖南寶慶府學額三名道州一名江西永新縣一名山東清平七名章邱五名○庚辰以江甯被水允馬新貽奏畱抵徵錢文爲採買倉穀及撫恤修圩之費○壬午諭軍機大臣等穆圖善奏

查明靈州降回變亂大概情形並暫委寶型護理安肅道篆各摺片前據左宗棠金順奏劉松山收復靈州情形已降旨將署靈州知州鍾蘭及代理知州尹泗等交部照例議卹並因馬化澂有給馬三重等僞札情事又代陝回甘言求撫前後兩歧殊難憑信諭令左宗棠嚴飭劉松山等乘勝進兵相機妥辦該大臣務當懍遵前旨督率劉松山等軍分別良莠剿撫兼施不得輕率收降致墮詭計左宗棠計已進駐平涼能否馳赴蘭垣居中調度仍著迅速具奏穆圖善莅甘數載熟悉情形見在甯夏防守緊要該將軍旣已交卸督篆著將省城防剿事宜布置妥協俟左宗棠到省或左宗棠派員接辦有人卽行前赴甯夏將軍本任以重職守所請來京陛見之處應無庸議所有穆圖善原部各軍均著歸左宗棠調遣甘軍餉項並著該大臣均勻分撥以利師行毋得稍分畛域安

肅道員一缺穆圖善見據肅州鎮總兵陶生林稟請暫委四品頂帶寶型護理該員係已革知縣資望太輕恐不足以勝任著左宗棠隨時察看如果不能稱職卽行另派妥員前往接署將此由五百里各諭令知之○諭金順奏官軍攻拔賊壘見在進剿情形一摺南路各堡寨攻克後經金順會同張曜督軍進剿將王家燒房油坊寨先後攻拔逆首馬鳴漳擒獲正法惟納王兩寨尙爲賊踞亟應乘勝進攻著金順會商張曜嚴飭派出官軍轉戰而前將該二寨迅圖規復以期次第廓清納家牯匪勢窮蹙回目納玉貴等赴營乞降如果能呈繳軍械馬匹捆獻賊黨並與王家疇莊斷絕往來自當分別辦理惟該逆反覆無常金順不可稍涉大意致墮詭謀將此由六百里諭令知之○諭總理各國事務衙門奏請添派立界大員一摺前因布倫托海所屬地方皆係塔爾巴哈台管

轄之地所有分界事宜業經諭令文碩約期馳往辦理惟見在布倫托海大臣既經裁撤該處立界事宜卽應統歸科布多大臣經理奎昌前與俄國使臣勘辦科布多邊界甚屬妥協情形較爲熟悉著卽改派奎昌於明歲春融時馳往該處與俄國使臣將瑪呢圖嘎圖勒汗至哈巴爾蘇一帶逐一查勘會立牌博文碩卽毋庸前往其應如何揀派嚮導及指授機宜之處仍著福濟遵照前旨悉心籌辦文碩既補授科布多幫辦大臣此次分界事宜亦當會同商議妥爲辦理原摺均著鈔給閱看將此由六百里各諭令知之○諭前因榮全奏賠償俄國諾海牲畜銀兩請於津海關或北洋三口俄國應納稅餉內照數扣收當交該衙門議奏茲據總理各國事務衙門戶部奏稱此項賠款既經榮全議定俄錢二十四萬約中國銀十一萬數千餘兩除委員薩碧屯已還過銀九千八

百二十兩外其餘銀十萬數千兩有零按照原議三年補償每年需銀三萬四千兩自應籌款分年補償惟北洋三口山海東海兩關並無俄國交納貨稅卽天津一關俄商陸運稅銀每年亦止一千餘兩不敷抵扣請於山西應解京餉內分年籌撥等語著李宗義飭令藩司於山西應解京餉內自明年爲始分作三年每年撥銀三萬四千兩交歸綏道轉解務須提前於每年三月起解四月解到烏里雅蘇台交榮全收納覈計三年共應解銀十萬二千兩於應賠俄國款項有無盈絀著福濟榮全查明辦理原摺均著鈔給閱看將此由六百里各諭令知之○予甘肅被戕縣丞陳聯樹祭葬世職○癸未免科布多所屬本年例貢貂皮○甲申諭軍機大臣等劉嶽昭岑毓英奏官軍收復昆陽州城並見在分剿各路賊匪情形一摺昆陽踞逆楊振鵬因城外賊壘蕩平率黨抗拒提

督馬如龍親往督辦楊振鵬意圖脫逃經張保和等設伏圍擊與馬聯魁等一併正法逃竄各匪截殺殆盡其往來迤西通賊之馬生瀧等亦經弋獲見在該處漢民均已歸業州境一律肅清著卽飭令該署州張啟辰等將善後事宜悉心經理其解往新興呈貢各屬之投誠同人亦著飭屬妥爲安置毋令日久滋事新興軍務雖將逆首劉綱等正法而州城見尙未下仍著劉嶽昭等督飭馬青雲各軍實力環攻迅圖克復省西土堆餘匪並著親督在事將弁晝夜攻取毋任苟延殘喘祿豐澂江竹園等處餘逆未平該督等務當嚴飭何秀林等各率所部馳往祿豐會合勦洗一面飭令張保和迅移得勝之師由昆陽前赴竹園相機勦擊迅殄寇氛其昆陽出力文武各員著劉嶽昭等查明彙案奏保昭通一路孔昭鈞等辦理若何唐友耕已否由昭通前赴省垣該督等當懷遵前

旨妥商調度並將昭通一切事宜及早籌辦用靖邊陲將此由六
百里各諭令知之○丙戌諭內閣醇郡王奏請整肅功令以杜專
擅一摺據稱領侍衛內大臣向無歸宗人府管轄之例自惇親王
補授宗令臚列直班新章多條奏准通行且將領侍衛內大臣直
班推班亦令一律呈報藉整頓之名啟攬權之漸且查操應否推
班及領米日限自應推班亦未載入章程殊屬遺漏請將新定直
班章程特派王大臣重加刪定等語惇親王向來辦事間有意氣
用事不能詳慎之處若如醇郡王所稱藉整頓公事爲名施竊弄
威柄之術諒惇親王亦斷不敢出此醇郡王措詞過當殊屬非是
著傳旨申飭惇親王醇郡王同爲國家懿親情聯手足總當以敦
睦爲懷不得各存意見至王公直班本有舊制可循所請特派王
大臣重定章程一節不特摺內所稱看操領米各事挂一漏萬且

亦徒事紛更著毋庸議宗人府前定直班章程日久不無窒礙亦著毋庸置議嗣後應在內直班之王大臣等遇進班之期如有藉詞推諉曠誤不到者一經發覺定當遵照嘉慶道光年間歷次所奉諭旨嚴行懲辦決不寬貸○官軍復甘肅靖遠縣城○予陝西向維知縣賈敬修祭葬世職○予甘肅傷亡副將穆隆阿祭葬世職○己丑諭內閣前因丁日昌奏訪查營弁人等滋事釀命當經降旨將遊擊薛蔭楊都司丁炳先行革職交馬新貽親提研審按律懲辦並將丁日昌交部議處茲據該撫奏稱續查案內有伊姪監生丁繼祖同往聞鬧先回並風聞伊子分發知府丁惠衡一併在內經署臬司杜文瀾督審稱伊子並未在場請將丁惠衡丁繼祖分別斥革徹底根究並自請革職治罪各等語此案營弁人等滋事釀命丁日昌之姪監生丁繼祖既經同往著卽斥革交馬

新貽歸案審訊伊子丁惠衡是否同往著於到案時一併交馬新貽審明虛實分別辦理丁日昌咎止失察前已交部議處所有自請治罪之處著毋庸議○庚寅諭內閣曾國藩奏堵築漫口合龍暨疏濬中洪下口均屬穩固深通一摺直隸永定河本年北四下汛漫口經曾國藩飭令道廳各員設法堵築見已合龍並據該督勘驗北四下汛暨南七兩處壩工均各穩固張家墳一帶所挑中洪南七以下所挖引河並能暢流無滯在事出力各員著准曾國藩擇尤保獎毋許冒濫嗣後仍當督飭該道廳等認真挑挖並隨時修治隄埵俾保無虞○諭前諭曾國藩察看臬司史念祖能否通曉刑名足資表率據實具奏茲據奏稱史念祖心地明白器局開展論事亦尙有識惟直隸刑名較繁該臬司資望尙淺著調刑名稍簡之省磨厲數年當可酌成令器等語臬司爲刑名總匯之

區無論何省均關緊要史念祖心地既尙明白若隨同曾國藩遇
事講求又加厯練於公事較有裨益著曾國藩飭令張樹聲將直
隸積案辦竣卽行前赴山西臬司本任史念祖俟接印任事後仍
著曾國藩隨時察看如不能稱職卽著據實具奏○壬辰子浙江
殉難翰林院編修張洵建祠○癸巳 上詣 大高殿祈雪○甲
午諭內閣侍讀學士鍾佩賢奏臬司責任綦重未宜輕授一招前
因曾國藩覆奏直隸臬司史念祖人尙明白可望陶成令器當諭
令曾國藩俟該臬司到任後隨時察看於造就人才之中實寓慎
重刑名之意茲據鍾佩賢奏稱與其察看於後貽誤已多曷若審
擇於前所全不少等語所奏亦不爲無見史念祖著卽開缺以原
官畱於直隸交曾國藩差委俾資學習如能諳練公務卽由該督
隨時奏聞至所請軍營保至藩臬人員查非科目出身及曾任實

缺道府者仍令先補道府察看稱職由該督撫奏明後列單請簡之處著吏部妥議章程具奏○乙未諭軍機大臣等福濟文碩奏俄國請分地界查有窒礙情形一摺塔城分界事宜前因布倫托海大臣裁撤改派奎昌於明歲春融時馳往該處會同俄使查勘立界茲覽福濟等摺內所陳窒礙情形不爲無見卽著文碩酌帶圖冊卷宗迅卽起程趕於明年正月內到京與總理各國事務衙門王大臣詳細面述妥籌辦理文碩起身後該處應行豫辦事宜仍著奎昌恪遵前旨與福濟隨時會商籌辦將此由五百里各諭令知之○允戶部奏飭各省豫撥來年京餉銀七百萬兩內務府經費銀六十萬兩○以錢鼎銘爲直隸按察使由大順廣道遷○丁酉諭內閣慶春奏查明熱河開荒漸侵正園酌擬章程請將查辦遲延之總管等交部議處一摺前因熱河圍場地多開曠經前任都統

瑞麟麒慶先後分別科則招佃展墾乃日久展放漫無限制以致
侵占正園自應查明禁止所有鑲白旗伊遜川開墾荒地卽著照
舊有大卡倫爲界其東河西佃墾私墾地畝均著飭令一律封禁
並著嚴檄該總管等督修卡倫建立紅椿毋令任意展墾慶春擬
於明歲春融後派原勘各員前往查勘界址按照科則酌予年限
以次裁撤並將私墾各戶一律驅逐旗民佃戶領地後陸續侵入
山坡溝岔以及領地以多報少各弊出示禁止定以懲罰章程著
庫克吉泰到任後詳細參酌妥爲辦理委員啟章王清經慶春
派令前赴圍場會同總管壽長督催修卡建椿乃任意遲延迄未
修整實屬咎無可辭圍場總管壽長候補知州員啟章准補喀拉
河屯巡檢王清均著交部議處以示薄懲○諭軍機大臣等穆圖
善奏馬步官軍剿賊獲勝暨請將同知畱營差遣各摺片善山保

一軍在黑茨溝剿賊殲斃甚多追至清水驛附近地方兩路伏賊突起後山保復督隊兜剿該匪敗竄其平番縣屬馬家溝馬賊亦經營總常明等在三岔溝迎戰分路夾擊賊勢不支紛紛敗退仍著左宗棠穆圖善檄飭善山保等偵探賊蹤分路追擊毋任該逆乘隙滋擾牽掣官軍左宗棠擬進駐平涼到省尙需時日卽著飭令派出之黃鼎等軍迅速前進以期節節掃蕩痛殄寇氛已革廣東候補知縣續保同知湯柄璣據穆圖善奏稱甘軍進攻河州需員差遣請予畱營等語湯柄璣是否諳練軍事堪以畱營差遣之處著左宗棠卽行查明具奏毋稍遷就將此由五百里各諭令知之○諭金順奏官軍連日進剿情形一摺逆回堅踞王家疰巢穴經金順會同提督張曜督軍進攻殲斃賊匪甚多賊圖搶踞長濠又經官軍擊退遂將新築賊壘一律蹋平總兵王連三等復兜剿

獲勝賊勢諒已窮蹙惟我軍傷亡亦復不少開挖地道尙未藏工
該逆憑牆出濠卡壘甚多亟應設法攻取著該署將軍會同張曜
督飭將弁加意籌攻務將該逆寨速拔以期掃蕩妖氛將此由六
百里諭令知之○予甘肅陣亡副將李宏林祭葬世職○是月豁
免直隸東明縣被淹被擾積欠額賦減免兩浙袁浦等三場拋荒
田畝上年竈課蠲免安徽無爲等十七州縣暨屯坐各衛被水節
年額賦租課蠲緩直隸開州等五十八州縣被水新舊額賦租課
倉穀山東濮州等六十七州縣德州等四衛東平所屯莊永阜等
二場歉收新舊額賦雜稅竈課湖南澧州等十二州縣暨岳州衛
被水新舊額賦租課緩徵兩淮富平等十四場被水竈地新舊錢
糧安徽亳州等三十七州縣暨屯坐各衛被水被旱被風被蟲新
舊額賦租課

十二月庚子諭軍機大臣等崇實吳棠奏援滇川軍克復魯甸廳城攻破巖崙老巢生擒首逆並檄調唐友耕分兵扼守敘南各摺片滇匪李本忠經川軍擊敗後由板板房桃源一帶分撲良回村寨唐友耕督兵截擊踏毀賊營該逆退守魯甸城內又經官兵擊走收復廳城李本忠逃入巖崙老巢參將尹士超等分路進攻疊破四面礮樓生擒李本忠及賊黨徐添驥等正法掃蕩巖崙賊巢昭魯漸次肅清此次援滇川軍疊克匪巢生擒要逆勦辦尙屬奮勉在事尤爲出力員弁著崇實等覈實奏保毋許冒濫見在黑石坳回匪勢尙猖獗唐友耕一軍自當乘勝進勦惟總兵全祖訓圍攻之兵未能得手委員孔昭鈐等亦無抵昭確期卽著劉嶽昭岑毓英迅飭全祖凱激勵兵勇會同唐友耕相機勦洗一面催令孔昭鈐等馳抵該處將一切勦撫事宜妥爲籌辦俾東路及早掃蕩

母稍遲延湘果各營散勇見既不遵資遣敕南邊界自應派兵設防以資彈壓著崇實等檄飭唐友耕酌撥得勝之師前赴鎮雄以顧筠連高珙入川門戶如有潰勇滋事卽會同胡中和籌辦至攻克黑石坳後仍畱李家福在滇援剿其唐友耕應否撤回川省之處著崇實等會商劉嶽昭岑毓英斟酌辦理將此由五百里各諭令知之○廣陝西鄉試中額一名○辛丑 上詣 大高殿祈雪

○壬寅諭內閣吏部尙書文祥之母秉性淑慎克享遐齡教子有方俾成良弼今以疾終深堪軫惻朝廷優禮大臣推恩賢母著賜祭一壇賞銀二千兩經理喪事由廣儲司給發靈柩回旗時沿途地方官妥爲照料以示優眷○兵部右侍郎伊精阿卒予祭葬賞銀三百兩治喪○以寶珣爲兵部右侍郎由內閣學士遷○劉典回籍養親以蔣志章爲陝西巡撫由四川布政使遷○癸卯諭軍機大臣等蘇鳳

文馮子材奏疊克越南夷境賊巢見在併力圍剿蘇鳳文奏接准越南國王咨文籌辦中外邊界事宜各一摺吳亞終股匪竄入越南疊經官軍跟蹤追剿攻破大慈買市等處賊巢該匪退踞左洲勢已窮蹙卽著馮子材督飭各軍四路圍攻悉數殲滅總期迅速肅功毋稍延緩此次收降人眾馮子材擬旋師之日儘數帶回內地辦理尙屬得宜惟人數既多則編插非易著該提督隨時給票分起遣送回籍蘇鳳文卽飭各該州縣妥爲安插嚴加約束毋令滋生事端至內地民人私出邊境例禁綦嚴地方官失察處分亦重蘇鳳文見擬申明定例檄飭太鎮兩府督屬嚴防並咨越南國王一體稽查卽著照所請認真辦理以期日久相安毋得有名無實將此由五百里各諭令知之○以王德固爲四川布政使由陝西按察使○甲辰諭軍機大臣等貴州軍務日久未冇起色川楚援黔

各軍頻年勦辦敎匪尙能克復城邑迨進勦苗巢楚軍敗於黃鵠
黔軍潰於羊安從此一蹶不復再振皆由各軍無人統攝互相觀
望以致坐糜鉅餉師老無功李鴻章威望素著見在重慶暫駐著
卽飭赴貴州所有川楚貴州各軍均歸節制該督卽逐加揀選申
明賞罰嚴檄各將領分投進勦互爲援應庶得同心協力迅奏膚
功儻川楚各軍不能得力卽行裁撤咨明崇實吳棠劉峴將此項
兵糈仍解赴李鴻章軍營充餉該督上年凱撤之師其中不乏驍
勇著卽酌量奏調赴黔以備調遣廣西防邊之兵如須調赴黔省
會勦並著李鴻章酌度辦理至李鴻章進兵克復地方後修治城
池招集流散聯保甲給籽種仍著曾璧光隨時商同李鴻章妥爲
經理不得以派有督兵大臣卽思誘卸貴州軍餉奇絀吳棠劉峴
務當隨時籌解以資飽騰本日已有旨令李瀚章署理湖廣總督

並令楊昌濬署理浙江巡撫李瀚章著卽馳赴湖北將應解餉需源源轉運母令缺乏此外協黔各省並著李鴻章曾璧光隨時咨催俾資接濟楊昌濬於接印後揀擇賢員署理藩司篆務不許存五日京兆之見稍有廢弛遵義民教各案前據李鴻章奏派道員余思樞赴黔會辦至今尙未具奏李鴻章見赴貴州卽著就近會同曾璧光迅速持平審結以弭釁端四川酉陽教案何以尙未復奏亦著一併迅結母得稍涉遷延將此由五百里諭知李鴻章崇實吳棠李瀚章劉崐曾璧光並諭楊昌濬知之○命協辦大學士湖廣總督李鴻章馳赴貴州督辦軍務○以李瀚章署湖廣總督楊昌濬署浙江巡撫由布政使署○以俊達爲江西按察使由奉天奉錦山海道遷○予安徽殉難知縣何薇照布政司理問銜方茂順等建祠○乙巳諭軍機大臣等都興阿等奏籌展邊荒請緩至明春再行勘

辦一摺展邊事宜關涉中外界限非相度地勢逐處履勘適中定
界將來不免輾轉見屆隆冬堅冰積雪一望瀰漫勢難勘丈自係
實在情形著照所請緩至來歲春融再行派委妥員前往江岸審
度該處情形相機試辦儻有窒礙難行之處卽由該將軍等隨時
酌覈奏明辦理務期中外相安永免後患不得稍涉推諉將此各
諭令知之○左宗棠奏欽奉諭旨該大臣見擬進駐平涼著將能
否馳赴蘭垣情形迅速具奏等因欽此臣准前署督臣穆圖善咨
稱蘭州省垣及西路甘涼肅三郡距涇較遠見雖交卸督篆如關
緊要軍務擬隨時權宜辦理另刊甯夏將軍木質關防鈐用具奏
等語比因北路軍情正在勦撫未定之際臣接篆後由涇州前進
止可暫駐平涼布置中路聯絡南路策應北路仍可控制西路若
徑駐蘭州設北路逆回被勦橫溢東路不惟劉松山雷正綰周蘭

亭張福齊徐文秀各軍無所稟承卽涇平赴蘭州驛道必致阻梗於秦隴大局均有防礙查會垣城關內外及金縣防兵不下三十餘營近又環掘長壕進攻雖或不足自守似尙有餘臣比咨請穆圖善督同在省司道就見有兵力保衛省垣又撥過餉銀十七萬兩准穆圖善緘稱軍心大定其地方日行公事責成藩司崇保代折代行遇有緊要之件隨時包封遞送臣營覈辦見在黃鼎張會元楊世俊崇志馬步各軍分布隆德靜甯會甯安定一帶蘭垣聲息已通其西遁陝回由狄道折竄清水驛大營川甘草店者均經各軍擊敗歸巢省城根本之地自期穩固接穆圖善來函從前嫌疑盡釋似與臣尙無芥蒂臣入平涼以來籌軍食賑災黎撫良民辦游匪力顧後路轉輸以重中路樞紐見飭卽補道蕭守幹總兵黃武賢由蘭州赴秦望川涼州一帶會同總兵王仁和總理屯政

安插石成器一股一俟北路局勢粗定南路裁併各營均有頭緒
臣卽當督率親軍鼓行而西爲進擣河州之計俟屆時察看情形
權衡緩急再將進止機宜詳細奏聞是否如斯伏候訓示又奏竊
陝回西竄經官軍進剿獲勝情形臣已馳報其時提督楊世俊徐
占彪馬步各營分防安定紅土窯地方訶陝回自十月初三日敗
遁狄道逆目崔三竄過洮河踞狄西三十里之雅哈川糾河州逆
目馬尕大馬占魁馬石等北竄揚言救援金積堡分股結寨隴西
屬之固城十家莊蔣家坪乘虛掠食覬覦南路十月十九日二鼓
各營募食急進徐占彪步隊循馬家河出固城之西楊世俊馬隊
由麻子川出固城之南五鼓齊抵賊巢馬隊張左右翼拒卜家莊
蔣家坪援賊步隊直薄堡下賊驚覺憑堡抗敵槍礮對轟楊世俊
察看堡牆高聳外環深壕欲圖進攻騎不如步遂令軍士下馬合

力攻其西面賊見官軍勢盛悉眾禦之壯士踰壕拊其背猱升而上立拔堡城守賊二百餘名無脫免者天明卜家莊蔣家坪援賊蠶至不虞官軍已入固城比其漸來漸近官軍從堡中躍馬揮戈而出乘勝猛擊之賊駭而奔各營馬步縱追十八里至春家掌餘逆向西南逸去後收隊回固城休息漏已三下矣是役斃賊八九百名生擒十九名訊出賊目馬文一名斬之官軍傷亡勇丁四名二十日各營自固城回防諜報崔三李經舉禹得彥大股八九千眾由狄道竄踞清水驛甘草店大營川蔓延金家崖楊世俊調集所部馬隊並約徐占彪出紅土窯道員李耀南出馬營監率師合剿二十一日午刻楊世俊徐占彪馬步齊至巉口令各營薄暮傳餐潛師夜起分道襲賊營以火箭爲號行抵車道嶺步隊由中路出甘草店馬隊循車道嶺山脊出清水驛四鼓馬步各路齊抵賊

巢號鼓齊鳴甘草店之賊始自夢中驚起叫號亂竄官軍已於月色微茫中槍礮連環轟擊夾以刀矛遇賊卽砍天明追賊入大營川悍賊列隊居前翼蔽羸弱冒死拌拒楊世俊率精騎斜鈔賊後邀其歸路賊返顧慌亂各營馬步乘之踏毀賊巢數十處賊棄輜重器械折由站灘黃石坪遁狄道馬隊跟追五十餘里玉新營水家坡沿途賊屍枕藉日暮乃收隊回大營川就地爲壘戍刻偵東路逆騎數百竄近巉口楊世俊徐占彪於二十三日五鼓整隊東向天明抵巉口賊之步騎已於先夜偷過向狄道西奔矣時李耀南所部亦至各軍分道窮追馬隊沿秤鉤驛疾馳好麥川緊躡賊蹤步隊繼之四路鈔擊竄賊數百一律聚殲得逸出者僅十餘騎而已訊據擒賊何畢梁禹三兒楊文德張九兒供稱此股乃馬生彥之弟馬生定及白彥虎之黨葉曾芷護賊眷西竄緣九月十九

日打拉城大敗後避匿荒谷晝伏夜動循郭城驛野蜜川魯家溝繞巉口西原而過不料官軍倏至也馬生定葉曾芷已均經官軍陣斬訊畢正法軍前計是役斃賊一千六七百名陝回由狄道而竄圖入河州合夥而河州逆回畏官軍進剿被其連累固拒不納陝回向河回買糧河回故高其價每斗四十斤索價銀四五兩陝回乏食分黨肆掠紅土窯迤西三十里之石家岔王家堡侵及麻子川等處楊世俊派馬隊自紅土窯馳擊李耀南自馬營監派步隊輔之二十九日四鼓各營馬步齊集紅土窯鼓行而西黎明遇賊騎千餘於王家堡副將盛照魁步隊循南原乘高壓下總兵蕭賞謙步隊循西川兜剿而前提督張仲春參將楊德俊馬隊分枝斜鈔賊之左右陣斬悍賊二三百名該逆向西北越溝鼠竄各營追殺六十餘里收隊而還十一月初一日午刻楊世俊誦賊騎千

餘圍攻安定縣西五十里細水岔田家窪民堡約徐占彪乘夜襲之派馬隊豫伏內官營截賊歸路初五日四鼓各營齊抵細水岔乘賊不備掩之分枝圍田家窪賊巢堡牆聳峙該逆列陣死拒槍礮對轟總兵陳春萬立馬當先面中叉子槍傷勇丁楊化熊揮旗猛進中礮而殞天明適徐占彪楊世俊歸蕩細水岔賊巢而來飭馬隊下馬環攻洋槍洋礮測準轟擊賊勢恟懼壯士一鼓齊登立毀其巢餘眾奪門向西南狂竄瞥見內官營塵起知張仲春楊德俊馬隊亦到各營乘機夾擊截殺數百名追至站灘收隊而還兩戰共斃賊千餘名生擒七八十名官軍弁勇傷亡四名王家堡之戰生擒賊目馬環訊供陝西大荔縣回民黨眾皆東彌憚賊田家窪之戰據擒賊供稱是陝回零股糾合狄道逆回由渭源竄來圖犯東路牽綴官軍者逆目馬油布當經陣斬矣初九日訶賊馬步

千餘由大寨子趨通安驛並踞楊坡店石家岔一帶踞通渭屬紅土窯三十里楊世俊飭張仲春楊德俊卽夜出隊會李耀南剿之四鼓馳抵楊坡店石家岔李耀南督所部輔營及平江三營同至彼此分途掩擊共斃賊三百餘名臣維南竄陝回除崔三禹得彥兩股外尙有白彥虎馬生彥等黨衆人數雖多能戰之賊不過數千惟河狄逆回及南路各逆回屢雜其間人數多少尙難懸擬然北不能遙通金積堡之援西不能遽合河州之勢窮蹙可知正宜斷其紛竄大舉圖之見飭周開錫將南路諸軍覈實歸併分布鞏秦一帶儲軍食作士氣遏其東趨飭黃鼎楊世俊等馬步各軍一面採運糧料一面雕剿回土零匪以免牽綴一俟北路局勢粗定卽從中路壓剿而前期收節肅清實效上諭見在各逆窮蹙北不能通金積堡之援西不能與河州遽合左宗棠等已令周開

錫將南路諸軍覈實歸併分布鞏秦一帶並令黃鼎等軍雕剿回土零匪卽著檄飭各該將領偵探賊蹤痛加剿洗一俟北路稍定卽由中路掃蕩而前毋稍鬆勁此次在事出力員弁勇丁准其彙案請保左宗棠見在駐軍平涼策應各路並派黃鼎等分布隆德靜甯會甯安定一帶雖與蘭州聲息相通而會垣防守事宜亦不可稍形疏懈穆圖善著懷遵前旨暫駐省城就見有兵力督同司道各官妥籌保衛左宗棠仍當隨時兼顧其石成器一股卽著飭令蕭宗幹等會同王仁和妥爲安插並將秦望川等處屯政趕緊料理北路之劉松山等軍並著催令前進以期節節疏通河州爲甘回負固之區必須破此巨巢方可迎刃而解著左宗棠察看情形如兵力足敷剿辦卽行督軍前進以竟全功將此由六百里各諭令知之○左宗棠奏劉松山一軍十月初七日剿賊獲勝大概

情形臣已附片陳明續接劉松山牘稱九月二十九日克復靈州城池及十月初二日連破里仁渠各寨賊益震懾馬化澂央總兵胡昌會保其永不反覆並力保陝回誠心就撫劉松山屬胡昌會飭馬化澂勒令陝回將馬械悉數呈繳去後訶秦渠南板橋馬家兩莊納家三寨丁家兩寨劉家灣子三莊馬家灣子四莊何家兩莊迤西蔡家橋莊蔡家四寨余家兩莊西南達金積堡村莊鱗次陝回麇聚其中人眾心雜投誠之議連日不決催繳馬械一味枝梧劉松山以該回兇狡成性仍宜乘間痛剿懾服其心初六日四鼓傳令各營分三路布壘陣一由左進板橋一由右進蔡家橋自督中軍出板橋蔡家橋之間馬隊張兩翼伏左右兩路之旁穩駐勿動俟步兵破賊則飛馬分道鈔之部署既定各軍進抵渠南半里許賊巢角聲四起紛紛憑渠開放槍礮提督何作霖軍功董福

詳各營撲近渠邊槍礮對轟賊仍死拒不退劉松山察看水淺者及膝深者沒腰飛令道員劉錦棠提督蕭章開督軍搶過橋卡分支由左右路梟水鈔擊中軍步隊亦越渠撲之賊潰向東西兩路狂奔提督余虎恩副都統雙壽馬隊截其歸路逆眾未及歸巢守巢之賊見官軍四集棄巢鼠竄爭出寨門西遁官軍乘勢奪門而入將大小莊寨三十餘處一律蕩平巢賊有冒死逸出者有圍殺殆盡者餘黨經各路馬步四面兜剿合併西趨波浪渠一水前橫逆眾擁擠不前官軍火器環轟賊中人馬應聲而倒填積渠中渠水盡赤官軍緊躡至金積堡外馬隊追過堡西敗賊西奔折而南向强家沙窩遁竄各軍卽分營填紮金積堡東北四里何家莊板橋一帶劉松山卽移紮距金積堡十四里之劉家寨是役殺斃淹斃之賊約二千有奇生擒二百八十四名內有賊目馬福李逢春

馬濇訊畢斬之獲陝回老弱眷口六百餘名拔出漢民數百名均派送靈州城交提督黃萬友妥爲安插官軍陣亡員弁並勇丁十六名此十月初七日官軍大勝實在情形也是夜馬化濇復夾胡昌會來營乞撫復代陝回繳馬七十七匹大小洋槍十七枝長矛一百三十二桿其餘馬械隨後呈繳劉松山勒限三日待之自後屢次催繳僅據馬化濇代繳破壞軍械數百件疲瘦馬騾數百頭詞愈卑而計愈狡陝回頭目馬正和余彥祿方懇收撫而陳林馬長順則不願繳馬械如故維時雷正綰周蘭亭簡敬臨張福齊各帶所部於十二日馳至偏渠築壘距金積堡遠者十餘里近者七八里胡昌會馬化濇力保陝回就撫藉稱該頭目及黨眾實因官軍勦敗衝散一時難於清繳馬械乞寬限時日悉數呈繳嗣陸續繳馬三百四十七匹槍械八百十九件二十七八等日續繳馬四

百三十五匹器械二百五十一件劉松山以該逆人眾心雜若必全眾收撫恐展轉需時又生別故因吳忠堡一帶甘回均已避匿金積堡所遺各堡已空令願就撫者呈造冊籍移居吳忠各堡悉繳馬械以便安插馬正和於十月初一二日先移男婦二百餘名入吳忠堡其餘正待遷移而陳林之黨東彌回眾從中截阻馬正和黨夥之嗜亂成性及眷口已被官軍衝散者無所顧戀亦復頓翻前議互相阻撓各逆首不能禁也劉松山以輕率收撫必貽後患初三日飛緘雷正綰周蘭亭張福齊簡敬臨等各整隊會剿適金運昌所部已先數日由花馬池靈州馳至是日午刻約齊出隊行抵板橋各逆知官軍進剿金積堡旁各堡寨吹角列隊紛紛抗拒劉松山屬金運昌率所部向金積堡西門進自分所部爲三支提督蕭章開王秀棣李雲貴楊清源朱德開由右道向金積堡之

北道員劉錦棠提督尹興茂李占椿喻執益曹義勝軍功董福祥
 張俊李雙良由左路向金積堡之東提督陶定昇易致中何作霖
 出中路劉松山自率提督譚拔萃周國勝李就山爲疊陣相機策
 應馬隊張左右翼斜出三路之旁逆回見官軍布陣更寬騎賊雖
 飛奔向前步賊仍膽縮不進官軍馬步奮威衝擊槍斃甫止刀矛
 隊如牆繼進立斃悍賊數百賊大潰不止官軍縱橫盪決將金積
 堡正北東北西北賊踞村寨二十餘處一律蕩平日暮收隊卽於
 金積堡北四里一帶安紮營壘計是役共斃賊約一千一二百名
 生擒一百三十餘名訊出逆目馬受元馬中吉正法此十一月初
 三日劉松山會合金運昌勦回獲勝情形也自是日以後雷正綰
 周蘭亭張福齊簡敬臨各軍皆如約會勦惟中隔金積堡陝甘各
 逆回又踞金積堡旁各堡寨湖渠環繞占地周數十里各軍聲息

難以徑達故彼此戰事未能盡歸一致所有雷正綰等各軍戰狀另摺詳陳以清眉目是夜有漢民自賊中逃出者稱各頭目議將眷口輜重併歸金積堡東西各寨明日決一死戰劉松山與金運昌商賊既肯來索戰當俟賊隊齊出再相勢分布應之初四日已刻金積堡東西各堡寨馬步賊傾巢而出步賊甫出半里卽止不前騎賊東西馳騁勢仍驕甚劉松山飭馬隊四營當之遇賊撲近且戰且收俟步賊漸前則各路奮起猛擊比各軍馬步五路分布已定馬隊亦誘賊近前然後中軍吹號擂鼓各軍奮威齊進賊勢不支紛紛敗潰五路馬步官軍乘勢衝殺斃賊無算敗賊回竄各巢憑寨死拒其殿後者經各營掩殺濠內外死屍駢列日暮始收隊而還是役東西兩路共斃賊八九百名劉松山所部生擒八十二名員弁勇丁陣亡二十一名提督李雲貴左臂受槍子傷譚上

達右胯受槍子傷弁丁受傷者一百一十三名此十一月初四日劉松山金運昌各軍獲勝情形也是夜訊生擒回逆知余彥祿左臂已帶子傷悍賊傷亡不少擬卽乘勝會剿迅期蕝事而連日朔風甚勁沙塵大起咫尺不辨不能出隊初七日風稍定劉松山會商金運昌出隊斃賊約四五百名生擒六十餘名弁丁陣亡十一名受傷六十五名劉松山以賊圖死守擬再移營偪之初八日一面出隊一面築壘賊拌死來爭官軍護修新壘分隊轟擊斃賊三百名生擒數十名弁丁陣亡七名受傷者四十六名是夜賊徒巢金積堡東西各堡以避官軍東路賊勢加增復就波浪渠堰修築長牆一道橫寬約三里劉松山旣約南路西路諸軍初九日會剿黎明會商金運昌出隊賊憑牆排列意圖死拒劉松山商令金運昌率所部卓勝軍西進飭蕭章開等率所部出卓勝軍之左劉

錦棠等各率所部由左路進朱德開等各率所部由右路進劉松山率陶定昇易致中何作霖周國勝由中路均向波浪渠長牆進飭譚拔萃等率所部頓於陣後相機策應飭余虎恩等率馬隊五營斜出劉錦棠之左雙壽花良阿等率吉林馬隊斜出朱德開之右賊見官軍數路整隊向長牆齊進騎賊皆下馬與步賊憑牆列隊官軍奮攻半時賊死拒不退劉松山飛飭董福祥余虎恩等馬步各營繞東而西突出卡後賊勢始亂各路馬步乘勢齊撲立將長牆一律踏平賊敗竄金積堡旁禮拜寺官軍躡蹤緊追忽大風捲地塵沙驟起敗賊復傍寺列隊回拒而金積堡北又出賊一股約七八百循牆而來似圖截官軍之後劉松山令朱德開李就山馳擊敗之賊仍向正路敗走官軍各路愈戰愈奮賊旋卻旋前者七八次均爲官軍所敗始棄巢而奔遂將禮拜寺攻破賊敗入寨

時交申刻風勢更緊乃收隊而還計是役攻破長牆回寺陣斬悍賊七八百名轟斃轟傷者一千數百名生擒百餘名訊出賊目馬九林陳萬得兩名正法員弁勇丁陣亡二十七名提督易致中左眼角受槍子傷從口內出軍功董福祥右肱肘被槍子洞穿弁丁受傷者一百八十二名是日雷正綰周蘭亭張福齊簡敬臨均力戰獲勝簡敬臨銳欲與劉松山合隊率所部隊伍繞波浪湖旁金積堡及各寨穿過致敗劉松山已收隊回營不及知也初十日辰刻劉松山令陳宗蕃由南路赴西路各軍計事晤幫辦簡敬臨營務廣東高州鎮總兵徐文秀知之回馬飛報劉松山駭悼不已立即撥三營移駐金積堡東北波浪湖尾一面緘商雷正綰周蘭亭張福齊出隊會剿十一日劉松山與金運昌仍分兩面出隊劉松山親率五營馬隊馳赴金積堡東南簡敬臨營盤所駐漢伯堡適

雷正綰亦到晤商一切詎賊偵知劉松山赴漢伯堡突出騎賊千數百遮截歸路劉松山當卽督隊馳回騎賊數十團猛撲近前勢甚兇悍劉松山指揮迎擊正鏖戰時劉錦棠蕭章開瞭見督馬步各隊由南路橫截而出賊卽潰走劉松山追至各寨邊撿斬悍賊百餘名奪獲戰馬七十餘匹收隊回營十二日賊伏巢不出是夜西南兩面悍賊腐聚東面取磚石修砌長橋自金積堡外壕迤而東約長三里又迤而南至波浪湖汊里許以拒官軍十三日劉松山飭各營出隊擊之賊憑壕穩抗槍石紛如雨下官軍馬步五路齊進劈山洋槍噴筒火箭次第齊施賊中死傷已多猶隔牆挺矛對刺官軍見其槍子磚石漸稀卽鼓勇齊登或聳身躍入或掘毀牆身從缺口搶入賊勢不支紛向各寨敗遁官軍壓追至寨旁寨門未啟賊皆依寨拚死回拒寨上開槍擲石助之官軍奮威衝殺

前者帶傷後者繼進鏖戰兩時久斃悍賊無算賊紛向金積堡南敗走一枝敗向堡東壕內官軍跟蹤掩殺壕內外賊屍枕藉日暮收隊是役共斃賊一千六七百名轟傷刺傷之賊約二千數百名生擒一百五十四名內有逆目馬辛馮標郭阿忻等數名訊知僞元帥沙學德已於牆破時轟斃矣記名提督李就山帶隊衝入賊中胸膛受礮子傷立殞於陣提督朱德開右膀受槍子傷軍功張萬會右肩受擡槍子傷弁丁受傷者二百四十六名陣亡者三十八名此十一月十三日以前官軍疊獲勝仗實在情形也臣維陝同陳林馬正和余彥祿等自打拉池擊敗折回金積堡時悍賊不過數千老弱婦女不計其數馬化澂代爲求撫而不悉繳馬械其包藏禍心可知經劉松山雷正綰及各軍疊次猛剿斃賊多矣而賊數不減反增於前金積吳忠爲靈州西南著名兩大堡吳忠堡

雖早廢而環吳忠二三十里堡寨土人皆呼爲吳忠堡金積堡亦然環金積各堡寨亦呼爲金積堡劉松山疊將吳忠各堡寨攻毀略盡卽金積堡北面一帶各堡寨亦已掃蕩一空見存者惟東西十數堡而已陝回敗蹙併入金積東西各堡與甘回雜居其預望韋州各堡甘回曾經官軍擊敗者從而附之馬化澂又時噉堡中回逆於夜間潛入東西各堡助逆賊數之所以已耗而旋增者以此陝回於屢敗之後意本求撫其喪失眷口之賊無所繫戀仍思乘冰橋北竄效捻逆故智因阻馬械不繳賊中所呼乾馬隊者也馬化澂資以糧糗槍礮噉其死抗官軍又一面稟知官軍陝回不悉繳馬械請急擊之賊勢之所以已窮而仍悍者以此見在冰凍早合北竄一著本屬可虞諸軍正悉力北面並咨商金順張曜嚴密巡防矣而近察賊情亦有難於北竄者有眷屬之回不肯他竄

者多無眷屬之回以疊負重傷不能他竄者亦多也金積堡糧料雖多而秣馬之草無從採取近據賊中逃出漢民均稱賊之騾駝馬匹餓斃者已三分之二羣相怨懟無可如何其勢實亦衰蹙特困獸猶鬪攻堅費人不敢不慎以圖之劉松山一軍各戰陣亡之頭品頂戴記名提督法福凌阿巴圖魯李就山從征十載戰必身先由東南而西北勦平髮逆擒逆卓著戰功此次因礮子穿胸立殞陣前實堪悼惜之至應懇 天恩飭部照提督陣亡例議給卹典並請予諡以彰忠烈提督銜記名總兵周本立記名總兵易作義儘先副將溫其林補用參將李必貴補用遊擊王順明盛德林張勝魁廖得英楊寶玉陳芝蘭補用都司萬友山葉宜恭楊俊發都司銜守備謝春和拔補守備朱鳳翔拔補千總譚連城王義勝李金山拔補把總劉萬勝劉得照軍功擬保把總楊復盛均衝鋒

陷陣血戰捐軀應懇 天恩飭部各照所保官階議給卹典以慰
忠魂又奏陝西提督雷正綰提督周蘭亭前衢州鎮總兵簡敬臨
總兵張福齊各軍於十月十二日進駐金積堡西南秦渠一帶臣
飭勦撫機宜均候劉松山商定酌度以一事權疊據雷正綰等牘
呈十一月初二日劉松山緘約次日會勦雷正綰周蘭亭張福齊
初三日午刻三路齊進所過回堡次第接捕隨結方陣進至平川
賊萬餘憑金積堡壕邊穩抗簡敬臨率所部六成隊徑抵金積堡
東南里許賊正與湘軍接仗不虞簡敬臨自後突至喊賊分拒簡
敬臨從賊巢竄入立將賊巢踏毀斃賊數百生擒十餘名正擬收
隊適劉松山已將北路賊寨蕩平移營偪紮敗賊由東路向南猛
撲簡敬臨且戰且收以槍礮列後轟擊斃騎賊數十而還初四日
辰刻各軍整隊以待已刻接劉松山緘約進勦雷正綰周蘭亭張

福齊三路齊進派隊畱守長壕賊分途抗拒官軍三路衝殺斃悍賊百餘名賊不能支追至三道壕邊敗賊合守賊萬餘憑壕死拒官軍調劈山礮洋槍各隊指定轟擊壕內外之賊應聲而倒紛向西門敗竄各軍躡蹤緊追斃賊無數立將村外帳棚一概焚毀追至金積堡城西北賊仍回頭抗拒另股騎賊復自北門繞出西路冀鈔官軍之後各軍復排槍礮連環轟擊其畱守長壕各營亦派隊截擊賊仍敗退壕內共計斃賊約數百名受傷者千餘官軍受傷者數十名陣亡者數名簡敬臨是日聞北路礮聲甚緊卽令各營堅守長壕親率各營六成隊出擊比抵金積堡邊騎賊從兩旁鈔出步賊拚死猛撲簡敬臨飭各營密結方陣俟賊撲近始層開槍礮轟之賊撲愈近鏖戰兩時聞北路礮聲已歇正擬連環收隊忽各堡出騎賊千餘步賊三四千四面擁至簡敬臨與營哨各官

均下馬親率刀矛隊從槍礮隊中衝殺而出當者辟易總兵蕭寶林左膀受矛傷穿透提督姚連陞左肩受矛傷裹創力戰刀矛隊愈戰愈奮立斃當先悍賊數十名乘勢掩殺陣斬賊百餘名生擒十餘名賊始敗潰日暮收隊而還計共斃賊數百名傷賊不計其數而勇丁之陣亡者二十一名受傷者八十七名營官受傷者二員哨官受傷者五員蓋血戰也初九日卯刻接劉松山信約會出隊辰刻東北礮聲大震雷正綰周蘭亭張福齊各率所部齊抵渠邊遙見賊勢趨重西路各軍整隊迎擊均結方陣槍礮刀矛勻布四面進至二道渠賊憑渠抗拒官軍奮威衝殺賊紛紛敗退追至三道渠甫令收隊忽另股騎步各賊狂奔而來又一股從東北馳至雷正綰周蘭亭張福齊復回旗堵之總兵趙玉亭周玉堂徐萬福副將楊美勝率礮隊自南路側出截擊賊仍敗退官軍復追至

三道渠收隊而還計共斃賊數百名其簡敬臨一軍於初九日辰刻聞北路礮聲甚緊卽率各營出隊馳抵金積堡東面遙見回逆正與劉松山接仗催軍急進金積堡東門渠邊五營緊結方陣步步進逼賊見官軍逼近騎賊從兩旁鈔出步賊拚死迎敵簡敬臨令各營整隊齊進槍礮層轟刀矛並舉斃賊不計其數是時北路賊眾已經劉松山各軍擊敗紛紛南竄簡敬臨銳圖衝過回巢與劉松山合隊過數堡將堡外賊棚一律焚毀維時南風大作塵沙蔽天咫尺莫辨各廢堡礮子雨下簡敬臨指揮各營仍結陣而前左臂已被礮子洞穿裹創復進營官譚正明力請收隊簡敬臨以賊雖敗竄仍踞各廢堡如遂收隊回營若廢堡中各賊儘力跟追翻難堵截仍令各營併力向前衝殺正分布間忽飛礮中簡敬臨頭顱殞於馬下各將弁見主將墜馬紛馳援救陣腳稍亂騎賊

數千遂乘虛突入中營將弁傷亡甚眾左營營官姚連陞右營營官譚正明見中營有失急策馬率隊馳援皆爲堡中礮子中傷步賊復叢矛攢刺譚正明陣亡姚連陞用矛連斃騎賊數人相繼殞命幫辦營務廣東高州鎮總兵徐文秀督中後兩營併力衝殺斃賊多名突圍而出連環收隊回營急令分守各壘一面飛報西路各軍派隊速援比賊眾麇至則壘中守具亦略有布置矣賊毀長牆拔花籬地刺而入去壘邊十數丈壘中槍礮頻施賊旋卻退悉踞壘前廢堡中徐文秀頻用開花礮向廢堡中一面轟擊但聞人馬沸騰聲計斃賊亦不少矣二鼓張福齊派總兵徐萬福周蘭亭派總兵趙玉亭各率所部由油麻湖踏冰而過號聲不絕四鼓到營賊已遁去初十日黎明雷正綰張福齊率各營至會商出隊進至金積堡東門渠邊賊眾叢擁而來雷正綰戰馬受傷韉亦擊斷

乃下馬揮刀督陣槍礮環施賊冒死衝撲數次均經擊退騎賊數千復由左右鈔出陣後張福齊令各營排劈山礮飽以羣子俟賊近轟之每礮必傷數賊數馬賊始敗竄官軍結隊緊追直抵金積堡日暮收隊而還十一日雷正綰等與劉松山約出隊會剿辰刻出隊東門渠邊遙見劉松山所部已與賊接仗張福齊揮軍前進雷正綰整隊繼之將近賊巢賊分投死拒槍子如雨官軍間有傷匹雷正綰張福齊督令前進劉松山馬步各營亦由東路猛撲而來賊始敗退十二日雷正綰等與劉松山會商布置後收隊回防仍與張福齊周蘭亭各畱隊伍駐中營助守是日劉松山歸途遇賊接仗獲勝十三日劉松山各軍大獲勝仗已於另摺陳明雷正綰周蘭亭亦於是日會剿獲勝尙未接其文報十三夜黃河水長渠流濊滿官軍與賊隔絕不能出隊數日內尙無戰事當俟水漸

涸退乃議會勦臣聞簡敬臨初九日之失飛致劉松山派馬步數營填紮原壘緣簡敬臨駐營之處近漢伯堡地在金積堡東南距劉松山北路各營雖止十五六里中隔波浪湖難於聯絡又彼此出隊必由各回堡寨穿過地偏寨多防不勝防見在催辦糧運節節轉輸一俟軍糧稍裕再派數營前往以資厚集簡敬臨自咸豐十年隨臣征剿江西安徽浙江福建廣東積功洊擢提督銜總兵計已受重傷十餘次前蒙恩補授浙江衢州鎮總兵因傷殘已甚臣請代陳乞恩開缺嗣以臣西征甚急復募勇丁前來轉戰而前壯懷彌厲李旺堡穆家潭之戰擒斬逆首楊文治蒙賞加頭品頂戴感激思奮遂以身殉合無仰懇 天恩飭將頭品頂戴提督銜前衢州鎮總兵鏗僧額巴圖魯簡敬臨照提督陣亡例議給卹典並懇予諡以存其人升用提督果勇巴圖魯姚連陞由勇丁隨征

積功海擢今職驍勇超羣秉性忠諒初四日之戰受傷時親兵負之以趨因見簡敬臨陣亡誼不獨生遂叱親兵速去跌坐以死其志節凜然有如此者應懇 天恩予諡並飭部照提督陣亡例議給卹典提督銜記名總兵譚正明補用總兵鄧雲高副將秦龍瑞羅榮貴參將宋維明晏發貴徐有錫王致清彭鼎升暨遊擊熊在新陳有忠顏有源李忠信侯澤順皮二喜周海庭都司劉固明丁雲祥胡玉發王喜章守備陳祖耀均縱橫血戰力竭捐軀應懇 天恩飭部均照所保官階議給卹典以慰忠魂得旨官軍擊賊迭獲勝仗仍著左宗棠激勵將士厚集勁軍將金積堡等處逆匪妥速殲除毋畱餘孽○賞八旗暨步軍綠營兵丁半月錢糧○予陝西陣亡提督銜總兵官簡敬臨提督李就山姚連陞祭葬世職並加恩予諡總兵官周本立等祭葬世職○丁未諭戶部月撥銀三

十萬兩濟巴里坤哈密兩城餉需○戊申諭軍機大臣等劉嶽昭等奏請將唐友耕一軍於昭通回務完竣遣撤回川並勦辦附省賊匪情形各摺片唐友耕一軍經崇實吳棠派令赴滇援勦該提督駐紮昭通疊次圍攻賊壘回眾窮蹙獻首乞降勦辦尙屬得手惟昭督一帶回民剽掠究因該軍肆口復仇以致該回眾懷疑生變見既辦有頭緒自應責令該提督將此事一手經理著崇實吳棠傳諭該提督趕緊將昭通回務辦竣卽率所部撤回川省其昭屬未盡事宜仍由劉嶽昭岑毓英督飭各該文武隨時相機辦理以臻周密至附省土堆悍匪築壘乞濠負隅抗拒經該督等督兵進剿已將紅廟賊壘及土堆村外賊碉全行攻克著卽乘此聲威將殘燬餘匪悉數殲除毋畱遺孽將此由六百里各諭令知之○以胡瑞瀾爲左副都御史

由宗人府
府丞遷

○己酉 上詣 大高殿祈

雪○乙卯諭內閣今歲雪澤愆期月蝕再見直隸山東等省歉收
沴祲之興上蒼示儆允宜倍加修省內外大小臣工亦當恪盡厥
職其有言責諸臣尤宜遇事直陳毋泛毋隱○諭軍機大臣等恩
麟奏披楞侵占哲孟雄等處地方廓爾喀與唐古特構釁情形各
等語披楞占去哲孟雄部落之獨結嶺及甲昔地方難保不復來
侵占卽著照恩麟所擬飭令該文武員弁前赴哲番住牧於險要
隘口嚴密防維以期有備無患布魯克巴屢拒披楞歷年攻戰因
眾寡不敵亦被占踞地面去歲布番來藏唐古特不加撫恤遂致
布番解體該番見在互相攻擊且有陸續投赴披楞納款之說亟
應加意拊循以弭邊患恩麟務當督飭該委員將布番內難先行
解釋一面設法撫綏仍令不動聲色自固疆圉廓爾喀以唐古特
上年借過礮位尙未還清負約欺陵調兵報仇若不豫爲排解勢

將兵連禍結著恩麟遴派幹員妥爲開導一面將後藏漢番營伍操練整齊卽親赴定日邊隘剴切曉諭以申舊約而息爭端德泰務將藏中一切事宜認真籌辦不可稍有疏虞將此各諭令知之

○丙辰 上詣 大高殿祈雪○諭軍機大臣等李鴻章崇實吳棠奏議結酉陽教案李鴻章奏遵義教案派員會辦暨起程回鄂各摺片酉陽州民教仇殺一案疊經諭令李鴻章等持平審辦茲據奏稱此案焚毀教堂係首犯何彩起意楊楨庭乘亂入城殺斃司鐸李國均非張佩超主謀見在楊楨庭業經病故何彩一犯已於訊明後正法所燒教堂並經給與梅西滿銀兩餘犯劉幅等均分別按律懲辦著卽照該督等所議辦理以示平允酉陽重慶等處民教仇隙已深今雖將此案辦結而日後民教雜處崇實吳棠等必須設法防維吳棠身任地方更屬責無旁貸所有各該處牧

令等官著隨時認真遴選務令妥爲整頓不可稍存偏袒致滋事端未獲之教民王學鼎等六犯卽著飭令川東道督屬嚴拏務獲究辦遵義一案前經李鴻章派令道員余思樞馳往查辦茲據奏稱四川候補道蹇閭籍隸遵義鄉望所歸遵民於打毀教堂亦知悔懼請飭曾璧光責成遵義府縣會同籌辦等語著曾璧光卽將遵義團練事宜委令蹇閭悉心經理以便會同余思樞及該處府縣各官將教案趕緊籌辦毋稍牽掣其梅教士有無被殺情事並著飭令該員等澈底查明毋稍含混嗣後該省遇有教民涉訟務須責令各地方官查照約章持平覈辦並將教士干預把持及書差搯索拖累等弊嚴爲禁止以消後患前因曾璧光奏稱黔省軍情緊急請派大員籌辦當經諭令李鴻章馳赴貴州督辦軍務原以四川湖南貴州各軍無知兵人員節制必致觀望不前李鴻章

見以西陽教案已結天門教案初起卽由川省起程東下自係未奉到本月初七日諭旨天門一案前經郭柏蔭查明奏結黔中地方糜爛非得該督前往督辦斷難淨埽寇氛著卽懷遵前旨趕緊折回應由何路入黔督軍進剿之處均著該督斟酌情形妥爲籌辦並著於接奉此旨後將應辦事宜先行馳奏以慰廑盼將此由六百里各諭令知之○丁巳諭軍機大臣等崇實吳棠奏援黔官軍勦苗獲勝請飭楚黔振旅會剿劉岷奏湖南援黔官軍疊次攻勦苗巢獲勝蘇鳳文奏苗匪竄入粵境防軍擊退各摺片四川援黔之軍經道員唐炯提督劉鶴齡等攻克鐵廠坡木城石壘復經提督陳希祥等疊斬苗逆軍聲頗振道員唐炯擬專力進剿銳意滅賊已經崇實吳棠籌給買米銀十萬兩並改撥月餉以資接濟湖南官軍自十月以後於鎮遠思州台拱等處截剿苗匪削平堅

寨苗地日蹙糧食缺乏席寶田業經抵營蕭榮芳新募之勇亦已起程正當乘此機會合力夾擊使川楚兩軍聲勢聯絡則苗逆不敢狡逞剿辦易於得手但恐川楚兩軍各分畛域以致復蹈前轍功敗垂成著李鴻章懷遵前旨迅赴黔省體察情形妥爲調度以期川楚各軍踴躍用命肅清黔境該省夏秋之交瘡癥盛行冬後雪巖凌崖一望無際尤當及時大舉不可稍涉遷延曾璧光職任封圻責無旁貸當隨時會同李鴻章悉心經理不得因有督兵大員稍存推諉崇實吳棠劉崐於派出各軍應給餉糈務宜源源撥解不得稍有缺乏以致停兵待餉貽誤戎機廣西懷遠融縣境內均被苗匪闖入經在防各軍擊退並剿平高陽寨匪但恐該匪乘間復來仍應嚴密防範著蘇鳳文飭令各軍加意防剿毋任分竄儼遠防不如近剿卽著李鴻章酌量調遣所有廣西此次出力員

并准由蘇鳳文擇尤彙案請獎母許冒濫將此由六百里各諭令知之○諭蘇鳳文馮子材奏蕩平吳逆全股越南各省肅清一摺逆匪吳亞終因大慈等巢攻克後逃併左洲官軍又將左洲收復追至岌斂左良等處連獲勝仗逆匪遁往古覽地方負隅自固同知王恩浩暨各將弁斬關擁入生擒吳逆眷屬及逆目謝八等多名並起獲吳亞終屍首同各逆一併梟示其越南永祥等處土匪亦經副將吳天興等攻破賊巢餘匪竄匿山西一帶按捕無遺剿辦尙屬奮勉所有高平諒山等處仍著蘇鳳文商同馮子材督飭將弁實力按捕以期各境土匪盡數鏟除毋致異日重煩兵力至粵西與越南交界地方尤易藏奸並著該撫檄飭該管文武員弁嚴申邊禁毋任奸民竄越致生事端內地各府善後事宜並著馮子材妥爲籌辦廣東應解月餉卽著蘇鳳文隨時咨催以資應用

將此由五百里各諭令知之○以文奎爲內閣學士

由詹事遷

○予貴

州陣亡副將李其貴等祭葬世職○戊午諭軍機大臣等金順奏

官軍擊剿援逆屢勝力拔王家疿莊附寨壘卡並請飭定安採辦

糧石徑運甯夏各摺片南路回匪因王家疿被圍窮蹙屢次糾黨

來援經金順會同張曜督飭馬步各軍分投迎剿屢獲勝仗援賊

遠遁金順與張曜復會督官軍於十一月二十三日將王家疿附

寨逆壘攻拔從此愈逼愈緊自可迅克堅巢卽著金順會同張曜

挑派得力隊伍偪紫賊濠晝夜環攻迅圖蕝事見在河冰凝結路

路可通旣據拏獲奸細供稱陝回馬正和等糾集大股有訂期十

二月初間來援之說阿拉善旗見復竄有馬隊洪廣一帶並有賊

騎數十人滋擾後路亟應嚴密籌防金順見已檄飭後套各營豫

爲戒備並咨會貢桑珠爾默特督率蒙兵會同畱防各營加意防

守所籌甚是卽著隨時力顧後路一面督飭前敵各軍相機攻剿毋爲賊匪所乘歸綏一帶防務定安務當實力籌辦毋稍疏虞至晉省河防當此嚴寒凍結之時關繫尤屬緊要李宗義當督率防河各營認真堵禦不得稍涉鬆懈甯夏湘軍需糧孔急著定安卽將左宗棠前次賑恤餘銀二萬兩在歸化包頭等處採辦糧石運解甯夏湘軍糧臺俾資軍食並著理藩院轉飭阿拉善親王貢桑珠爾默特籌辦駱駝二千隻配帶鞍繩送交甯夏以資轉運前因戶部籌撥巴哈兩城餉銀三十萬兩諭令定安俟此項餉銀解到綏城卽派員解赴烏里雅蘇台交福濟等收納分撥巴哈兩城應用見在該城待餉甚殷刻不可緩前項餉銀一到定安務當迅速派員妥解毋稍遲延將此由六百里各諭令知之○諭曾璧光奏官軍殲除襲城賊匪並請添撥餉銀一摺貴州貴定縣城自上年

收復後城垣殘缺無力興修本年十一月間復被賊匪襲入當經該處文武等官會同派援各軍立將賊匪殲除殆盡功罪尙足相抵所有該文武等應得疏防處分著免其置議並著曾璧光飭令總兵吳占勝等迅將餘匪悉數殄滅毋畱餘孽貴州賊匪蔓延兵丁餉缺情形苦累亟應寬爲籌撥方免匱乏之虞山東軍務肅清餉力尙可周轉著丁寶楨卽照曾璧光所請按月籌撥餉銀二萬兩滙解赴黔交曾璧光收納以濟要需將此由六百里各諭令知之○予甘肅陣亡副將徐效孟等祭葬世職○己未諭軍機大臣等近聞陝西北山一帶居民流離失所迄未復業情形甚爲困苦而土匪游勇嘯聚成羣隨在皆是扈彰等所部投誠人眾尙有數萬仰食於官日久旣難爲繼若置之不顧又易因飢生變致滋事端延榆綏地本瘠苦近來受害尤深榆林又密邇回氛且毗連草

地目前難民土匪游勇降眾麇集其間非慎選牧令妥爲安插必致釀成巨患不特陝省受其荼毒卽晉省西北兩路亦均可虞朝廷實深厯繫著劉典卽將該處確切情形據實具奏不得因從前已報肅清稍涉回護見在北山一帶防兵共有若干分駐何處統帶何員一併查明具奏仍一面督飭文武各員設法彈壓撫綏消弭隱患不准存五日京兆之見蔣志章到任時劉典務將該處應辦事宜及如何布置之處詳細告知俾措置悉臻妥善毋稍膜視將此由五百里諭令知之○庚申肅親王華豐卒賞銀一千兩治喪賜祭葬諡曰恪○撥吉林防禦五員移紮琿春增設佐領三員防禦委佐領二員驍騎校五員領催十三名披甲一百五十七名分爲八旗管理裁原設副甲二百名○辛酉諭軍機大臣等昨因陝西北門一帶流民失所土匪游勇降眾隨在麇集特諭劉典將

該處確切情形據實具奏茲復據該署撫奏稱距延水關七十里地方有匪搶奪民糧並圍攻小場寨等事業經署知府喻步蓮等帶勇馳剿斬馘多名見擬將收撫甘省難民數千人安插涇陽咸陽境內開墾荒地派主事周瑞松擇其精壯者編成數營按日操練等語可見該省土匪游勇嘯聚滋擾在在堪虞亟宜設法彈壓撫綏消弭隱患北山一帶地方遼闊處處接連甘境該匪竄踞無定防不勝防尤慮吳忠金積等堡回逆被剿窮蹙突犯陝疆董扈降眾人數甚多更虞日久生變前竄宜川騎賊雖經都司劉厚填追斬數名難保不乘虛再竄劉典母得存五日京兆之見仍著飭令喻步蓮劉厚填等上緊按捕嚴密梭巡至難民編立成營固屬一舉兩得惟當責成周瑞松實力辦理認真操練不得敷衍了事所有辦理一切情形仍著隨時據實具奏將此由五百里諭令知

之○撥部庫銀十萬兩濟新疆餉需○壬戌諭內閣前因內閣侍讀學士鍾佩賢奏軍營保至藩臬人員查非科目出身及曾任實缺道府者仍令先補道府當交吏部妥議章程具奏茲據奏稱勞績保案仍應按照章程不准保記名請簡及指項題奏等名目各等語卽著照該部所擬嗣後各省督撫暨統兵大臣遇有勞績保案仍照舊章不准保至藩臬兩司其道府等官仍不得保至記名簡放及指項題奏等名目其從前已保藩臬記名題奏者如非曾任實缺道府無論是否科目出身及曾任丞倅州縣等官均准其戴用原銜一律先補道員俟得缺到任後由各該督撫察看如果實能稱職准該督撫出具考語可否升用之處奏明請旨如不能稱職亦隨時奏參毋得遷就其鹽運使一項從前如有保奏記名者亦照此辦理至賢能素著之員仍著各直省督撫懷遵本年六

月初五日諭旨畱心察訪隨時保奏另片奏軍營保舉道府州縣等官試用一年期滿請嚴行甄別等語卽著照該部所議章程辦理○癸亥命曾國藩賑恤畿南災黎○設巴彥蘇蘇營撥壘爾根索倫佐領驍騎校各一員防禦四員○甲子以貽祭 太廟 上前期親詣行禮○乙丑諭軍機大臣等穆圖善奏賊匪阻擾運道疊經官軍擊勦袁保恆奏歸併協餉請旨飭遵各摺片甘省西路回匪在李家窯地方搶劫糧運又於三子溝一帶攻掠民堡經提督劉定邦督隊疾追斃賊多名其竄擾石門溝青沙嶺小川賊匪亦經分防各營擊退古浪運省牲畜突被馬賊搶去統領張萬美等在黑松驛等處將賊擊敗入山穆圖善見擬將糧路改由大靖土門一帶行走並分軍擇要駐守著卽檄飭張萬美等實力堵禦以利轉輸一面飭令薩英阿嚴扼金縣杜賊東竄之路西路平番

古浪一帶爲甘垣運道所關此時各匪乏食希圖搶掠軍糧疲我
兵力非得大軍進剿省防仍屬可虞左宗棠前派之黃鼎等軍見
已行抵何處該大臣駐軍平涼於省城聲息亦可相通卽著嚴飭
黃鼎等各率所部確探賊蹤會合追剿不可稍涉遷延穆圖善奏
傷病並發懇請給假等語著賞假一箇月以資調理見在西路防
剿緊急該將軍仍當督同在省司道各官妥爲籌布左宗棠亦當
懷遵疊次諭旨迅籌兼顧如不能剋期前進卽行酌派委員馳往
接替穆圖善所部各營協餉袁保恆擬請自同治九年正月爲始
歸併西征糧臺支發著卽照所請辦理其同治八年十二月以前
各省所欠穆圖善協餉與甘軍積年舊欠仍著袁保恆隨時咨催
按數補發不得意存畛域將此由五百里諭知左宗棠穆圖善並
傳諭袁保恆知之○予甘肅陣亡參將樊友才等祭葬世職○是

月蠲緩江蘇高郵等三十六州廳縣淮安等四衛被水被旱新舊額賦太倉等三十四州廳縣蘇州等五衛被水額賦雜課安徽無爲等三十五州縣浙江仁和等六十一州縣杭嚴等三衛被水被旱被風被蟲山西薩拉齊等七廳縣被水被雹廣西新甯等三十一州縣被旱被擾新舊額賦湖北沔陽等三十州縣被水新舊額賦租課緩徵吉林三姓甯古塔旗民歉收倉穀銀兩河南鄭州等六十二州縣被水被旱新舊額賦租課○是歲朝鮮琉球越南入貢○會計天下民穀數除江蘇安徽福建雲南廣西未經冊報外奉天等省通共大小男婦二萬三千九百一萬一千三百二十一名口存食米穀二百八十八萬六千五百五十四石二斗九升八合五勺